

# “SIGARETTE”

Sketch di

Giuseppe Fazio

TABACCHINO

Signori miei, statemi a scutari, che sulu vuiatri mi putiti iutari. Oggi chiù di tutto e risaputu, chi u fumo potta soddi in assoluto, ed io sugnu incaricato di vindiri u chiù possibili trinciatu. Ma di sigaretti ci 'ndi sunnu a milioni, e ognunu chi propri illusioni. Ecco picchè oggi sugnu ccà, pi ciccari a megghiu qualità. Ora chi sapiti a me situazioni, tocca a vuiatri diri i vostri opinioni.

MS

Signore e signori, vistu chi sugnu a prima a parrari a virità vi vogghiu diri. Si unu si voli 'nzignari a fumari, non c'è autra soluzioni, cù mia hava cuminciari. Ma chistu non pi vanità, ma picchè u mè tabaccu è da megghiu qualità. E chistu fa tanta differenza, u nomi stissu u dici, ms a megghiu sumenza.

*(Collegati)*

KIM

Ma statti mutu e non spaddari ciatu, u to nomi sulu na cosa voli diri, motti sicura pi cù t'hà fumatu. Iò sugnu a sigaretta chi fa cori, chi fa scattriri tutti i fumaturi, a cu u me fumu si ietta 'nta la panza, ci si aprunu pulmuni, cannarozza e 'ntelligenza. Pecciò, su tabacchinu tanti soddi voli guadagnari, cù mia sulu i pò fari.

GAMEL

Iò non avissi mancu a parrari, ma vistu chi su ccà, dù paroli i vogghiu diri. Vaddati u mè pacchettu cari signori, sulu i so culuri fannu lucchiri, non pari disignatu d'un pitturi? E si di fora c'è tanta vistosità, figurativi intra chi ci sarà. Pecciò non vaiu oltri e tagghiu cuttu, cù mia ata fumari si ci vuliti truvare gustu.

*(Collegati)*

NAZIONALI

Iò comu paccu non sugnu tantu beddu, essendu italianu (o nazionali) sugnu povireddu, ma i biddizzi sunnu sulu apparenza, chiddu chi cunta è la sustanza. U mè tabaccu è fattu cù crianza, sulu u ciuru inchi naschi e panza, pruvatulu, e facitindi spirienza, inutili chi scutati a sti malasumenza, picchè chisti, misi 'ntà nà bilanza, non valunu na lira, anzi, mancu un'unza.

SUPER

Iò di chiddu c'hannu dittu mi 'ndi sbattu, già sulu u mè nomi dici tuttu. Essendu u megghiu in assoluto, di tutti su malidiciutu, ma iò, russu l'hau u mè pacchettu, e quindi dù malocchiu su protettu. E allora cari fumaturi, cù pigghia a mia fa doppiu affari, primu, cù fuma super è un gran signuri, e secundu chi vi pruteggiu di maiari.

DIANA

Ma cù quali curaggu diciti ssi cosi, chi chiddi chi bi fumunu su tutti rafatusi, 'ntà su tabaccu si trova tutti cosi, lignu, ramigna e catrami in grandi dosi. Iò sugnu l'unica originali, 'nto me tabaccu non c'è nenti chi fa mali. Caru tabacchinu, si vò fari soddi onestamenti, mettiti cù mia e non ti 'ndi penti.

MARLBORO

Dopu chiddu cà sintutu, vogghiu diri un provebbiu risaputu. Quando unu s'hava 'mbriacari, u megghiu vinu hava pigghiaru, inutili mi cecca acqua tina, picchè fà mali e va 'ntà carina. Vistu chi i provebbi su virità, bi 'ndi dicu nautru, e mi 'ndi vaiu di ccà. Scutati a mia vu dicu cu tuttu u cori, al buon intenditor pochi paroli.

N 80

Faciti finta chi nenti hatu sintutu, ora cuminciu iò cù mè parratu. Iò sugnu comu lu granatu, brutto di fora e d'intra sapuritu, a tutti ci fazzu peddiri u ciatu p la putenza chi havi u mè trinciatu. Ogni buccata è duci e sapurita, e sicuramenti bi longa puru a vita. Allora chi cosa ciccati chiù, cù mia fumati cosi boni e campati di chiù.

*(Collegati)*

#### FUTURA

Iò dicu chi fumari è salutari, non sulu allonga a vita, ma aiuta a respirari. Vaddati quandu unu è raffriddatu, e havi nasu e pettu tuttu stuppato, ma si fa na para di tirati, subitu i vii havi libirati, picchè u fumu è caudu e camina, e chistu p lu muccu è nà ruina. Pecciò, la sigaretta è nà cura, ma non tutti, sulu a futura.

#### MERIT

Facemu nà scummissa tutti pari, ci dumandamu a tutti i fumaturi. Qual è la sigaretta chiù comuni, chi ci piaci a tutti puru e cani? Inddi bi rispundunu a miliuni, a merit, senza nessuna discussioni. Camina amunindi tabbacchinu, pigghimi braccetta e 'ndiemu, enutili mi stamu 'ntà stà ghiazza a sentiri cazzati a tutta fozza.

*(Collegata)*

#### CARTIER

Iò dicu Santu Diu comu si faci, a diri sti minzogni a viva vuci, mittitibi anima e cori 'npaci, chi iò su la chiù ciccata picchè a chiù duci. 'ntò mè tabbacu u meli c'è biscatu, pi rendiri chiù duci lu buccatu. E si iò dicu na minzogna, avissi a bruciari viva senza virgogna. Si dopu stù giuramentu non mi criditi, bi vaiu 'nto culu a tutti quantu siti.

#### ESPORTAZIONI

Un salutu a tutti i prisenti, ma i me paroli vannu e non fumanti. A chiddi chi si sentunu 'mportanti, dicendu du fumu cosi sprizzanti. Bi dicu invece mi fumati, si pi scecchi non vuliti essiri pigghiati, enutili mi siti diffidenti. Fumandu bi niricati prumuna, cannarozza, e macara i denti. Ma sa giusta strada vuliti pigghiari, scutatimi, cu mia hata cuminciari.

#### MURATI

Ma picchè ghiacchiati comu i cani, enutili mi sbramiati maccarruni, non è chi cù fa vuci havi raggiuni. Sbramiandu non risubbiti nenti, bi sgaggiati i cannarozza sulamenti. Iò sugnu la sigaretta chi svara la menti, e manda li pinzeri chiù distanti, e chisti non su paroli ma su fatti, pecciò scutati a mia, fumati muratti.

#### ALFA

A cettu chi parrasti propiu giustu, chi sulu u tò nomi fa disgustu, e c'è puru u rimanenti, chi faci straciari a tanta genti. U picchè bu dicu subitu all'istanti. Facitibi na scena 'ntà la menti, immaginati un fumaturi chi vaci o tabbacchinu, u tabbaccaru ci spia, vossia chi voli, muratti, ci dici 'ndù mischinu. U tabbaccaru, capendu malamenti, ci sauta di 'ncoddu tempu nenti, veni cà chi tù rattu bonu, e cù na lapazza ci fa veniri un sintomu. Cù mia u tabbaccaru staci chetu, basta ricuddari a prima lettira dill'alfabetu.

#### POLMONI

Signuri scusatimi pu ciatu, ma comu viditi su mali cumminatu. Mi fici tuttu niru tempu 'nenti, ma purtroppo non ci pozzu fari nenti. Sugnu ziccatu 'nto cristianu chi fuma tri pacchetti o ionnu nenti i menu, ah, s'havissi i mani e na scupetta, ci sparassi subitu 'ntà bucca apetta. Ma invece l'ha supputtari, o mè patruni chi mi faci mali. E' veru ch'a sigaretta svara la menti, ma è altrettantu veru chi manda o campusantu tanta genti.